



湯



愛  
國  
書  
局  
藏  
書

文不貴乎能言而貴乎不能不言六經為亶古大  
文然皆發於聖人之心所不容已譬猶雲既滂而  
靈雨不得不降氣既至而蟄雷不得不鳴雨降而  
生物潤雷出而地材奮則夫大儒立言以垂教來  
世亦豈得已哉如湯子遺書是已湯子為誰睢陽  
潛菴先生也先生位至工部尚書卒於官乃天下  
之學者以先生傳正學紹絕業力肩斯道之重為  
一代大儒羣宗而師之故稱子始先生從容城孫  
鍾元徵君講學於夏峯以聖賢相期許其學以慎  
獨為宗以體認天理為要而實踐於人倫日用之

朱戶

間自少至老服官中外時時以忠主庇民澤及萬  
物為心而其撫吳二年深仁厚澤距今垂二紀士  
民謳思之如昨日非至誠感人能至此乎予與先  
生生同鄉宦同朝嘗申之以世講重之以婚姻予  
心欽其名德嚴事之若師友今又幸繼先生後塵  
奉

命撫吳且十三載無日不遵前事為後事之師亦  
步亦趨瞠乎恐後守而弗失幸免於戾先生純德  
豐功炳麟史冊至於文章爾雅訓詞深厚講學有  
規化民有教讀法於鄉箴儆於官皆發於中心之

所不容已今遺書具在也其門下士王大令廷燦  
表章師說出奉金鉞諸梨可謂知所務矣既訖工  
請予序余嘗讀先生書純粹以精即片言寸簡無  
非卓然載道之文誠若張子所云為天地立心為  
生民立命為往聖繼絕學為萬世開太平庶幾近  
之烏庠如先生者豈非仁以為己任者哉是其為  
文固實有諸其中而非道不足而強言者所可幾  
也遂序之以行世西陂宋榮撰

余避人睢州值潛菴先生以關西叅政請十旬假就之論知本之學與關東賀靈臺先生知本說合因留睢半月且屬余記其太夫人殉節事去既而舉制科與先生作同年生且同入史館遂得辯前代得失并古今來禮教名法知先生裕經術外擴而中堅體用具備真所謂應元運而興者會

天子重其學進青宮保傅兼領叅知入東閣作宰相判官遂以春官侍郎出開府江南使跋歷中外為

聖朝儒術之冠余乞疾南還過其境見關門坦坦然

毛序

一

農安畝而估習市武吏與暴客刷跡而徙閭樓夜鳴瑟游媚貴富皆嚮晦闇外卷余顧之歎曰儒術之效如此耶乃未幾還院補冬官尚書而驟遭棟折先生且騎鯨矣其在今距先生捐館舍將二十年而京朝先後思之者如昨日江南之民一若服稅服雖相隔多歲月而偶然斂衽必哭泣因有慕其人稽其事願讀其所遺書者聞河撫閻君曾為梓其集而未備也王子似齋者先生門下士也家世習理學蚤歲見知而授受親切其視扶風之於北海不啻有過然且筮仕吳城正值先生所屬

地遂輯舊集所遺軼購其全捐奉而付之剞人而  
以余為先生友并具書問屬其同門沈子昭嗣踵  
余寓而請余以序夫世之所謂三立者謂夫德與  
功與言也而實則一立而無所不立古未有聖賢  
而關事功者况文章乎即宣尼抱聖德每傷世之  
不我用而退而著書然而書既成而聖德愈顯且  
有讀其書而謂功在萬世雖堯舜莫能過則是文  
章之無間於德與功也先生踐履篤實務為善去  
惡以求慎獨而出而應世則入叅宰執出領方州  
明明有實效見諸成事此其功德為何如者而即  
以文論與子言孝與臣言忠不必飾講席之迹而  
發言中道不偏亦不矯其為羣儒所取正者何限  
然且言議慷慨周旋政事堂多所建白而至於外  
臺入告則請賑請蠲尤劇剴切嘗曰吾受  
天子命以出為民吏目擊痼瘼即過為激鑄寧得罪  
死官下亦何敢緘嘿負

天子命而

天子神聖亦即以是優容之然則先生之言其有繫  
於世如此若其高文典冊揚

廟堂之盛則 綸扉判詞槐廳起草舉凡應 制應

試之作往往而是夫既已舉於春官彙筆三館而復登制科膺鴻儒博學之選則文可知矣似齋輯其書復爲編類曰語錄曰奏疏曰序曰記曰書牘曰賦頌論辨曰碑版文曰雜文曰告諭曰詩詞而總附年譜誌狀於其末嗟乎世之求先生書者可以觀焉

康熙四十二年癸未嘉平月蕭山毛奇齡拜手謹

題

毛序



湯子遺書目錄

丁卯冬先生薨於位友人田箕山評其遺藁刻於中州彭少司成又刻節要於吳門門人蔡彬與其宗人九霞謀刻全集惜未梓完癸未燦搜輯遺文益所未備編爲十卷顏曰湯子遺書從九霞之舊也先生往矣後之學者思先生而不得見讀先生遺書如見先生焉雖其畢生之道德功業垂諸不朽者不獨以文傳然而讀其文益以見先生之不可及也云爾門人王廷燦謹識

湯子遺書目錄

卷一

周易尚書四子書皆古聖賢語錄也其言廣大精深總以闡明道要降而爲諸子百家近於雜漢唐箋疏涉於誣去聖賢之旨遠矣皇極西銘近思錄諸書庶幾近之我 夫子所以語人者一以存誠主敬爲宗以脩身實踐爲究竟此真近得濂洛之微旨遠契鄒魯之道妙者也集語

錄

卷二

嘉謀嘉猷入告爾后大臣之體則然然求其爲

民請命而纏緜剴切紙上如聞太息聲者匡禘  
圭陸宣公張曲江數人至今獨傳 夫子撫江  
南裁二載而請蠲請賑疏凡數十上恫瘝百姓  
言人所不敢言真所謂傷居爾體痛在臣心忠  
愛之誠溢於楮背今試取其文展讀再四必不  
以余言為阿所好也集奏疏

卷三

序之體不一有序其書者如孔子之序書子夏  
之序詩是也有序其人與事者如漢史之世家  
列傳是也要以理有旁搜詞無溢美務使我之  
精思奧義隳括乎其書與人與事之中而實洋  
溢乎其書與人與事之外於 夫子之諸序見  
之矣集序文

卷四

事何以記甚重乎其事也重其事奈何鬻宮明  
倫也書院興學也立祠功德之在人 難歿也  
會館有記重桑梓也記寺記堂記山房或嘉其  
勞或重其人也砥世礪俗彰往勸來固煌煌乎  
鉅典哉有其事無其文不傳 夫子之文誠足  
以傳之矣集碑記

卷五

楊惲之與會宗固多怨悻之詞昌黎之上宰相未免干進之意若夫不卑不亢辭旨和平惟發明性命之微與戒懼慎獨之要者尺牘中固不多得也 夫子集中如與孫徵君田箕山諸公書網繆往復直抉性理諸書之要其中或簡或詳各因其人所云與呂公言不得不少與溫公言不得不多也集書牘

卷六

賦頌之體麗以則如陳周鼎商彝論辨之體精

而核如指草蛇灰線此其大凡也析言之賦不難於典贍而難於流逸頌不難於張皇而難於微婉論則確陳其是不使我有未窮之蘊辯則直指其非不開人以可議之端求其披窾導郤而又游刃有餘者微 夫子吾誰與歸集賦頌

論辯

卷七

蔡中郎曠世逸才也其志傳碑銘之文無慮數十篇而自敘則云不愧我文者惟郭有道由此言觀之則伯喈之苟作亦多矣我 夫子生平

不妄交一人不輕發一語豈其人既歿顧反爲  
諛墓之文乎我信其文因以信其文所傳之人  
也集傳及墓誌并行述事狀

卷八

文之不能無雜著也如歲之有閏餘也大衍之  
有歸奇也五嶽之有分支四瀆之有岐渚也皆  
天地自然之數而不可缺者况經世之文原非  
常額所拘乎欲分類則體孤欲他附則義別因  
另爲一卷集雜文

卷九

嘗讀漢詔有云雕文刻鏤傷農事者也錦繡纂  
組害女紅者也是飢寒之本也又云人不患其  
不智患其爲詐不患其不勇患其爲暴不患其  
不富患其無厭當時詔令所及至有扶杖往觀  
歎息泣下者 夫子下車伊始即有禁奢侈嚴  
賭博斥淫祠諸教條刊布遠近訓誡諄諄務期  
與斯民更始真浸淫乎漢詔而出之者仁人之  
言其利溥矣集告諭

卷十

古詩以六朝爲宗康樂參軍非不妍擅詞場也

而必以淵明爲稱首律體自遵三唐高岑溫李  
各臻妙境矣然必於少陵推絕調焉詩固佳抑  
其人忠貞節烈有必不可沒者甚矣詩固以人  
重也今讀 夫子 賜遊溫泉 講筵紀  
事諸詩體氣神似少陵詩餘仿古樂府而真至  
朴實則儼然柴桑之遺也詩不朽有不朽乎其  
詩者在集詩詞

附錄

集既成因附年譜行實併墓誌祭文輓詩與節  
要建坊等文於末一以誌 夫行事之實一

湯子遺書目錄

五

以存同人景行之私蓋傳 夫子之文所以傳  
夫子之爲人也而 夫子之文傳同人之頌述  
夫 夫子者亦將藉是以俱傳太史公所云非  
附青雲之士惡能施聲於後世蓋於茲益信云

楊 中 獲 像



像

卓哉湯子一代偉人挺生應運嵩岳降神臯  
 稷契濂洛闡閔庶幾媿美兼備取身家稱孝子  
 國號名臣出為觀察敷政寧民土細之紀克寬  
 克仁橋樑不阿負氣嶙峋用舍行藏樂我天真  
 帝心簡在名自楓宸琳琅翰苑黼黻朝紳韓歐  
 鑑珽吳同倫持衡束泝桃李藁藁澤被草土望  
 重北辰追愍鳳采奕亦臣鄰仰名儀衷莫不尊  
 親

錢塘後學徐日熿

劉錫允錄

湯子遺書卷一目錄

語錄

仁和門人沈佳柘城竇克勤鞏縣姚爾申

手述 二十三條

柘城竇克勤日錄 四十九條

男溥手述 四條

錢塘門人王廷燦手述 五條

秀水門人范景手述 十四條

附

志學會約

湯子遺書卷一

睢陽 湯 斌

潛菴

語錄

仁和門人沈 佳拓城寶克勤鞏縣姚爾申

手述 二十三條

人皆可以為堯舜要體察我之可為堯舜者何在  
識得工夫自不容已

問喜怒哀樂未發曰當於人欲淨盡時驗之既而  
曰先儒教人看未發前氣象正是教人下手做工  
夫最親切處

湯子遺書卷一 語錄

一  
上古吳龍溪菴寫  
金闕劉薛文刊

語姚岳生曰鳶飛魚躍如何是子思子嘒緊為人  
處答曰鳶魚上下皆道之機也吾人體道不可須  
臾離亦是如此曰然滿前洋溢俱是發育峻極何  
處得個空閑容我疎放耶然却隨處自有個恰好  
的道理一切將迎期必總用不著所以工夫正在  
勿忘勿助之間

學者讀書不務身體力行專為先儒辨同異亦是  
玩物喪志先儒之言都是自已用工夫體認過來  
無一句不是實話總之源頭澄澈隨時立教不妨  
互異正當反求諸身識其所以同者勿向話頭討

分曉始得

問仁之體可一言盡否曰仁體極難形似如何一言可盡仁者得天地生物之心此言最宜體會

近代學者皆以近溪為禪近溪蚤於釋典丹經無不探討晚年語錄一本諸大學孝弟慈之旨絕口不及二氏其孫伯愚嘗私閱中峰廣錄近溪一見輒持去曰汝曹慎勿觀此禪宗之說最令人躲閃一入其中如落陷阱更能轉出頭來復歸聖學者百無一二惟究心大學孝弟慈之旨足矣近溪世所號為近禪者其言如此則沉溺詖淫者可不知

所戒哉

湯子遺書卷一 語錄

二

夜坐岳生閒問曰先儒有因人泛問輒曰汝輩是揀心中疑的問是揀難的問蓋非誠心切問先儒常不輕答

一日舉必有事焉勿忘勿助長以告曰助長非必著力緊促只容些小私意便是

先儒嘗有言頓悟之非不知悟未有不頓者但必學問真積力久方有一旦豁然大悟處是頓因於漸也古人由悟而悔由悔而悟真實用功一日憬然醒悟渾身汗下透出本來面目從前悞亦有益

若不痛不癢剽竊聖賢言語糟粕縱步趨無失究竟成一鄉原到對天質人處心中多少愧怍

時有以助長爲患者曰心體原是天機動靜內外無不周流但時時體認天理不令昏散亦不可躁迫須知必有事焉工夫原極精密勿助長非放鬆之謂也稍鬆放便忘非必有事矣總之涉有意便是私心

人不患思慮不寧只患心體未透

學者最怕是實未了然之心含糊歸依以實未湊泊之身將就冒認

湯子遺書卷一 語錄

三

小人只是不認得獨字。

問事親從兄有許多儀節亦不可不知曰如何可不知但所謂儀節如問安視膳昏定晨省此念從何而起侍父母而問安視膳昏定晨省有時離父母則儀節於何處行須要透得孝弟根源則充之足以保四海矣

問何思何慮曰何思何慮非全無思慮也觀同歸殊塗一致百慮可見非無思慮惟得其所謂一致者雖千變萬化而寂然者自在也

心中有趣纔得樂此趣從不愧不忤而生不愧不

忤從戒慎恐懼而出學者先有用力處後有得力處

凡人爲一善事則心安而體舒爲一不善事則心不安而色媿可見人一身內渾是天理於此便見人性皆善人能隨事體察勿虧此心本體無爲其所不爲無欲其所不欲這便是盡心復性的真實工夫故格物是要緊事

道在日用任人一步一趨無往不有天理流行之妙舍却子臣弟友更有何道故曰中庸不可能也惟中庸故難能故入其中愈尋味愈樂

爲學工夫只在當下

湯子遺書卷一 語錄

四

或問孟子言性善陽明言無善無惡心之體何也曰此是對有善有惡意之動而言心之體不但惡非所有即善亦不得而名也善亦不得而名乃爲至善孟子言性善究竟是於情上看出性之善如何可說下言知善知惡是良知這良知便是性之虛靈不昧處惻隱羞惡辭讓是非皆從此出是即孟子所謂性善宋儒言主敬陽明恐學者過於執著反於心體上多一敬字故教人只提醒良知便是其言無善無惡只是教人涵養未發勿過執著

而已

凡事功不從心性上發出於自己毫無干涉若於心性上毫無虧欠顏子之蔬水簞瓢便是禹稷事業

聖賢學問只在心性上用功譬如種樹日於根本上培養灌溉久之自然暢茂條達縱未暢茂條達根本自在今人只於枝葉上用功外面雖極好看究之全非已有

今人為學須持心堅牢如鐵壁銅牆一切毀譽是非畧不為其所動乃可漸入若有一毫為人的意思未有不入於流俗者

湯子遺書卷一語錄

五

嗚呼此先大夫之所嘗語也先大夫與臣言忠與子言孝平居講習討論有來問者未嘗不竭誠而發其覆也蓋言之可傳者百此矣惜乎未經彙錄此編為姚岳生寶敏修沈昭嗣各因所聞而識之者然存語雖少皆先大夫躬行心得之餘也男溥敬識

柘城竇克勤日錄 四十九條

學者須明義利之介孔子曰君子喻於義又曰富與貴是人之所欲也不以其道得之不處也貧與賤是人之所惡也不以其道得之不去也能在此處立定天下無事不可為所以平天下到底只說到義上去

學者有自立之志當拔出流俗不可泛泛與世浮沉

破除流俗是學者第一關鍵透出便是豪傑

日之行也日復一日總無一息而已君子之為學也顧可息乎一時息則一時非學矣曾子曰仁以為己任死而後已朱子以為一息尚存此志不容少懈其警惕學人莫有痛切於此者

大凡學人具剛勇之志量者其造道恒深中庸說知說仁終必說勇勇是收拾上面處若無這個便不濟事

顏淵問仁夫子只教以克復數語說得規模既極弘遠功夫又極切實顏子聞言便直下承當其大勇者乎

事不論大小只論是非學者須令事事合理一事不可忽畧故曰浩然之氣是集義所生者曰集義是日積月累事功夫不可一時息一有息時便與天行之健不相似

理流行於天地間不有此身則虛而無著此身關係最重不可不敬其身

天地生物勢不能無闕陷有闕陷處端賴人以補

助之故人能贊天地之化育方為克盡人道  
中庸之書甚是整齊初從天命說起中間支派分  
明末又自下學立心之始說歸天命去首尾一貫  
甚好看

問士之守曰中庸說不變塞至死不變觀兩變字  
可見人能自立者不之而敗於末路者亦復不少  
先生曰觀人全在末路上

宋儒教人道理說不盡留有待學人之疑至  
明儒說得太盡人反忽過不能深入有得也

斯道淪落聖賢不數數見三代而後如漢僅一仲  
舒隋僅一文申子唐僅一昌黎然學未必純雖宋  
有濂洛諸大儒又不無生不同時居不同地之感  
大抵學道之事能與大家講明同歸於善固其素  
心若世人不知而已獨為之亦惟躬行實踐自盡  
其道而已矣

為學於舉世講學之日學之途或慮其雜為學於  
舉世不知為學之日學之事猶存其真故聖道沉  
淪或一二知己散處四方心期砥礪吾道已處其  
孤天地間正不可無此真脩君子以為維持  
天下之理感應二者而已

聖人之意寄之於言真有言不能盡意處學者讀書當默識以求得若徒泥乎詞以求之則聖人之意亦有時而晦矣如太極圖周子欲顯其象以示人勢不得不疊畫幾個圈子若論其理則太極之中即有陰陽五行如何可分周子當日豈見不及此只是落到言語上自須如此說畫到圖樣上自須如此畫此際總在學者默識而心通之爾先儒解易特地創解無所依據後人觀玩甚省力却不加思索只據現成說粗心看去此後人所以不及前人也

問處世之道曰初之用潛不成乎名其處世而能善者乎君子處世不韜光晦顯使人得以名之則忌之者衆矣先生曰作易者其有憂患乎其慮天下來世無一不備後人取而觀玩之固無在不得處世之道也

君子慎言語節飲食見得明道者此言語亂道者亦此言語故慎之養生者此飲食害生者亦此飲食故節之

漸之進得位以卦畫推之似初上未為得位問曰進得位以中四爻言也先生曰何獨遺初上乎問

曰此自卦變而言謂自渙而來九進居三自旅而來九進居五各當其位故止以中四爻取義而不及乎初上也先生曰程傳於六爻皆取之而謂初上二爻陽上陰下亦為得位似覺未安問曰玩其象又似少此一層不得蓋總六爻論之良下巽上有男下乎女之象分初上二爻觀之陽上陰下又有夫婦尊卑之象女未歸則男先下乎女女既歸則婦不先乎夫二者互相發明義始備也先生曰程傳不主卦變今觀卦畫皆是乾坤而來三四陰陽相交其女歸之日乎上二爻皆乾下二爻皆坤其既為夫婦之後乎只將三四爻合看上下四爻分看自有精義可思

刑之一事聖人每慎言之旅之象曰君子以明慎用刑而不留獄與噬嗑之明罰勅法賁之明庶政無敢折獄同一慎重之意曾子曰如得其情則哀矜而勿喜其萬世用刑之準乎

兌之麗澤何取朋友講習之義程子曰兩澤相麗互相滋益妙在滋益二字已與朋友講習之義相關切矣

問各卦爻取義不同有取本爻者有取他爻者隨

時而觀各惟所適如兌之三四五爻皆在他爻取義若執本文求之又不得先生曰兌有相引而說之義故聖人繫兌之本文多於他爻取義

問人之德業必資友而成兌之六三來兌初二豈不是他好處卻繫之以凶想是他陰柔不中正只是以非道說之爾若剛柔得中正之位聖人自不如此說此際當隨其時以觀之先生曰如此看三百八十四爻皆活

包羞是小人之爻若君子筮得此必有自心歉然之事

春秋之義顯而可尋人自不體爾如公如晉胡氏亦未有傳驟讀之幾不知其何屬一取上文連類考之則書法自明上文書天王崩公自宜如周而乃如晉是忽天王而重霸國其罪不言自見矣微子之去止遯於郊爾後人妄以歸周為言不知微子商之元子也亦聖人也豈有歸周之理甚至有面縛銜璧之說何其敢於誣聖人也要知受封於宋在武庚被誅之後而白馬來賓之詩亦周人誇耀之詞爾然究以客禮待之而不臣也至於祭又令得用天子之禮樂其所以處之者厚矣

商之天下已失而武王於箕子之囚則釋之此時  
為箕子者審乎天理人情之安惟不仕於周即其  
所以報商者也乃其時道統在上而不在下箕子  
以一身荷堯舜以來相傳之道不容泯沒無傳王  
訪於箕子箕子安得不為萬世存道統為萬世存  
道統安得不為堯王陳洪範聖人審天命人事之  
歸其心公天下而不以一毫私意與於其間道可  
傳則傳之義不可仕則弗仕之武王亦亟於訪道  
而不強箕子以仕故封於朝鮮而不臣也嗚呼可  
謂仁之至義之盡矣

齊家之道與治國不同臣之在國也有犯無隱若  
以此道施之於家則不可家之中不得徑行其直  
須有委曲默為轉移之法

齊家之道最難周子云家親而國與天下疎惟其  
親故不可以義傷恩又不可以恩掩義然則教家  
者亦惟漸漬化薰而已久當自變也

論義門鄭氏曰禮義之心必如此浹洽方為善道  
然非一朝一夕之故先生曰家道惟創始為難久  
則相承即間有不率禮義之風已成可觀摩而化  
也

問胎教曰只是無時不宜以正自處爾先生曰古之言胎教者原子之未生而言也婦人以正自處不言可見意不重此

教子弟只是令他讀書他有聖賢幾句話在胸中  
有時借聖賢言語照他行事開導之他便易有省  
悟處

從來以女賈禍者不可勝數然非旦夕之故即如  
人家舊守家風本無他事乃忽動念為改觀之事  
令女子讀書習字妄念一起後患即伏將來必有  
受之者矣

聖人之言包舉無遺試觀九經始言脩身次言尊  
賢次言親親以至臣民百工遠人諸侯無不處之  
各得其道聖人之學通天徹地後世之儒者徒見  
迂疎淺陋而已矣

節用最關治道若經制不定財用靡侈未有能幾  
於治者

自聖人之道不明至漢而人崇黃老之術大抵亦  
是承秦攻伐之後人心厭紛擾而思恬靜固時會  
使然也問曰帝王之治天下有禮以維持大綱其  
間質文損益隨時而變亂極思治治極思亂考其

時會可知也當秦漢時固動極思靜之會但可動亦可靜者莫如聖人之道當時何無一人講明與天下相休息必崇尚黃老何為乎先生曰聖人之道與時消息惜當時無人知之故終漢之世治術不純至唐而益甚

古之民有四今之民有六其耗財已至何怪匱乏相繼乎問曰古之士為真儒農皆樂業商賈安居今則士無真脩農日困迫富商大賈雖或相安然亦坐而待敝矧又益諸僧道諸游民從而耗其財此皆本業不修之故也先生曰欲驅浮惰而農之

惟在使民樂為農今之為農者力作不足供賦稅不見其樂而止見其苦苦則思逃逃則不復思返如商賈之徒固是奔競之心勝亦緣不能安業故思他圖又如僧道輩其心豈不欲有父母妻子之樂多緣農困無以為生故逃歸僧道既逸其力又不匱於衣食則亦安之不思返矣是莫若輕徭薄賦使民安於農而樂為之則游惰者不驅而歸農矣問曰游惰者歸農矣其間貧富相耀風俗終難整理若何先生曰此最難處今之時勢與古不同古之時無甚貧甚富之俗所以易治今之富者由

連阡陌貧者至求數畝自給而不可得此中甚費  
區畫今但使一鄉之中富者明禮義興仁讓有以  
庇貧者而不至失業則後此可以徐圖矣明太祖  
召江南父老諭以至道無欺凌貧民亦此意也

明太祖定制令府州縣各有鄉長總理一鄉之事  
遇有祭孤魂等事亦鄉長主其事每鄉置亭鄉長  
常至其處稽鄉人之善惡而籍記之以爲勸懲小  
事直決之鄉長大事方告有司所以獄訟衰息又  
聞老人云洪武時每逢朝覲令天下里老各赴京  
詢以民隱及歸即令掌社倉積穀備荒畧倣古義  
倉之制及後在史館閱明制誠然其立法甚詳密  
後之愛民者恐不能出此規模也

湯淑原問適所論治道就一邑論之有司若立申  
明亭之類專其責於鄉長令以時書善惡爲勸懲  
未有不可成俗者何有司莫之行乎先生曰後世  
利欲浸漬極重難返留心治道者絕少若有司有  
志復古整理一方儘可行去初無難事

問鄉舉里選雖不能復似亦不可廢先生曰明初  
極重此典此典廢而專重科舉亦慮賢否並進名  
實混淆不如舍彼取此爾問曰只緣後世取士除

以言觀人更無別法故如此然究其立法之意亦是鄉舉里選之遺但取士以言與取士以德收效不同今科舉不能廢若更兼德行之選舉不亦可乎此事實與風俗相表裏又須將風俗整頓如置鄉長設義倉之類措置得法方可先生曰然

爲臣而不盡職非君子也爲臣而踰乎職分之所當爲亦非君子也欲不至於不盡職任事必須做事欲不踰乎職分之所當爲多事不如省事

官無論尊卑各有當盡之職爲一官即盡一職便是天地位萬物育的氣象至於司教一席培養人材潛移世運關係特重時克勤將就教職先生又曰人有動念利祿者當其始君子已病其終一心扶持名教便無不盡職之慮

儒者不患不信理患在信之過而用法過嚴者亦是一病天地間法情理三字原並行不悖如官司有弗稱職者若優容貽害固不可必嫉之過而加以重罪至隕命析產亦不忍有仁術焉輕其罪使之蚤去則我亦不流於殘而民已除其害矣

天下事惟公而已矣向在潼關時惟於此字甚得力

先生任潼關時年饑麥不熟兵餉匱乏人心騷動先生知之欲發倉儲秋糧以貸俟來年麥收仍以兩季麥糧撥發督鎮不可先生曰今事變倉卒非可拘以常數若以此安撫人心利害由我而當何不可變通行之督鎮以為然及召各營弁諭之衆皆歡欣感謝變遂寢後督鎮每謂僚屬曰作事如湯公真可謂盡職無遺憾有能做而行之者即善類也

先生任潼關時同列問曰得百姓心易得僚屬心難公何兼而致之易如也先生曰吾於屬吏不惟不取其財且彼有善吾力成之以遂其願故人或不以為苦同列曰無所取於彼何所應於上先生曰無所取於彼亦無所應於上交際之禮不過尋常帛物四件上官且戲謂吾禮物有班數亦各諒之無所受也至往來過往之官未有以金帛為贈者其於上下間如此而已

先生任潼關時無取於屬吏屬吏不得肆暴百姓無取於津吏津吏不得貽害商賈無取於武弁武弁不得尅減軍糧以此行之人感德深至所以自關中來者有望門而拜者有經過塋中拜其祖墓

者其得人心如此

問潼關之政先生曰惟於保甲鄉約社學義倉四者加之意而已又曰實政錄不可不讀也

先生時為講官曰講官所職者大宜從源頭上整理古人正色立朝其一段至誠感孚處有格君心於不自知者君心正而天下治此猶天之樞紐轉運衆星而人不之見者也講官又是默令樞紐能轉運底是何等關係

康熙壬戌春闈下第將歸先生留止之設榻齋頭晨夕晤對講論互發答問無遺因撮其語並事跡約畧記之凡三閱月而歸柘城寶克勤記

湯子遺書卷一 語錄

七

男溥手述 六條

課子溥等讀書嘗至夜分不輟曰吾非望汝蚤貴少年兒宜使苦苦則志定將來不失足也

天理二字不可不時時體察用力既久愈見親切從此行將去自然仰不愧俯不怍

在林下時或勸之著書曰學貴日新今之所是異日未必不以為非何敢妄為

撫吳時秉燭治事四鼓始假寐日中始食或勸進藥餌恐事煩心血漸槁非暮年所宜慨然曰君命即天命也且曰吾自信者心也安能保其必當乎

占易以彖象為主常曰易非教人趨吉避凶祇審理之當否其進退存亡介在幾微間非沉潛玩味不能得也

臨歿時自潞河勘楠木歸感風寒疾漏下二鼓猶戒子溥等曰孟子言乍見孺子入井皆有怵惕惻隱之心汝等當養此真心真心時時發見則可上與天通若但依成規襲外貌終為鄉愿無益也

錢塘門人王廷燦手述

五條

年少登科切勿自喜見識未到學問未足一生喫虧在此即使登高第陟高位庸庸碌碌徒與草木同朽耳往往老成之人一入仕途建立一二事便足千古由其閱歷深也

諸生能喫苦否喫得苦無事做不來死於安樂生於憂患刻刻當存此念

學問之道全在收拾此心此心不曾收拾毋論聲色貨利皆是戕害我身之具即讀書誦詩亦為玩物喪志

讀書遇古人疑難大事先須掩卷靜思如我處此何以措置然後看將下去方知古人得失學識方有長進不然一直看去古人自古人我自我有何

益處

漢人全尚氣節有鋒芒有圭角終非聖賢地位聖賢非無氣節却從性分中發出皆是天理流行不可名之為氣節

秀水門人范

景手述

十四條

景侍先生問涉世之道如何曰言忠信行篤敬聖人教人不過如是

君子小人在天地間如陰陽之相乘試看從古以來雖極治時舉朝皆君子其間也有小人就是極亂時舉朝皆小人其間也有獨為君子的有志者

正須自立

湯子遺書卷一 語錄

十九

先生撫吳時聞有當事登壇講學者慨然語景曰學當躬行實踐不在乎講講則必有異同有異同便是門戶爭端當初孫夏峯先生為一代大儒未曾應聘開講不過於一室中二三同志從容問答而已若必登壇南面聚衆而談何異禪門家數問為政當以順民情為第一義否曰然良久又曰也有順不得的所在即如我當初在贛州作道時正值海寇猖獗忽有賊持偽檄到撫軍轅門撫軍傳余甚急食頃三至余詣撫軍所以此賊付余余

在轅門訊之百姓觀者如堵頗多惶惑余請撫軍  
急梟示以絕賊人覬覦撫軍猶豫欲監候上聞余  
意不容稍緩請益力因令押赴市曹百姓人人震  
恐遮道而請曰殺之則賊衆大至百萬生靈不保  
矣余曉百姓曰殺之則賊知我不懼而不敢來即  
賊衆果至我自方畧保障抵敵爾百姓無恐此  
賊亦大呼曰兩國相爭不斬來使余呵之曰汝賊  
耳安得云國亟斬之尋賊敗去竟無警使是時稍  
順民情不斷然斬之奸宄生心保無意外之變乎  
此豈不是順不得處非是當初年少氣壯只是明

理耳

先生問聞吳中上方山神最靈祭賽最盛起於何  
時景對曰相傳是南宋時沿流到今靈異之說皆  
出鄉里之傳說耳先生曰鬼神福善禍淫治幽贊  
化若來祭享者方免其禍不來祭享者即降以災  
直與世間貪官行事一般定是邪鬼決非正神吾  
只是不信

乙丑夏候先生於院署因留宿署中時已二鼓先  
生猶辦事未寢至景榻前從容問近所施設果允  
協人心否抑猶有當行而未及行者否蓋先生德

愈盛而心愈下如此

自古治日常少亂日常多要知亂日之所以多者皆緣人之情欲相感邪淫日生其氣上通於天故天降喪亂日甚一日然天心仁愛常欲撥亂反治故篤生聖人以為天下主設不生聖人則人之相殘相害無有已時非上天生人之意矣

自古有為之君必親君子遠小人與君子日親自與小人日遠與小人日遠凡聲色貨利之欲土木興作之煩奇技淫巧之物俱耳目所不及見心思所不及謀君志清明忠言易入天下事可理矣

湯子遺書卷一

語錄

三

天生民而立之君人君之職在於安民安民之道在於擇相故曰勞於求賢而逸於得人此總其大綱以御天下者萬世人君之道也

封建與井田相表裏井田不可復矣明大封同姓之制使諸王散居於外而不假以權却最得法

人君之所最重者無如總憲朝廷有違德總憲則匡之宰相有失政總憲則糾之六曹有不盡職卿大夫有不守度總憲則劾奏之舉凡用人行政無一非總憲之責職固若此其重也而豈易副哉

學問之事有為己為人之別真修君子朴實做去

不求人知人亦莫得而知之直至邈世不見知而不悔此纔是真實學問故為己之學聖人有味乎其言之也

易有象必有理數與理相因非判而為二者也其斷以吉凶者亦就一定之理以斷之至孔子繫易純是說理雖周家卜世三十卜年八百若有定數畢竟有文武詒謀之善方能永久若秦至二世而亡亦似有定數畢竟始皇所為不善以致此數固不離乎理也

易重陽剛故成天下事者必剛健中正若柔順中正必有相助者始可成功此陰陽之辨也

湯子遺書卷一

語錄

三

問豐之六五柔暗之主二三四爻之障蔽皆由此爻不好至此爻却說來章何也先生曰他爻之障蔽皆由此爻不好若此爻能不使他爻障蔽便是他大有好處故只以來章言之亦見他是陰暗不能獨立必借人而成若不能來章即不能有慶譽之吉矣戒意已具詞中也

附

志學會約

學者莫先於立志孔子十五志學便志到從心所

欲不踰矩我輩四五十尚未知志學何以爲人  
程子曰言學便以道爲志言人便以聖爲志今與  
諸君子立會以志學名欲先定其志要識聖人之  
所志者何志所學者何學如適京師者必先識京  
師之路雖相去千萬里畢竟路迳不差漸次可近  
京師否則適北而南轅用力愈勤相去愈遠矣後  
列會約數則大約本之馮少墟先生舊約而稍稍  
增損附以己見亦藉以就正先生長者焉

一會以每月初一十一廿一中午爲期不用東邀  
一揖就坐世情寒溫語不必多各言十日內言行

之得失務要直述無隱善則同人獎之過則規正  
所講以身心性命綱常倫理爲主其書以四書五  
經孝經小學濂洛關閩金谿河東姚江諸大儒語  
錄及通鑑綱目大學衍義等書爲主不許浮泛空  
談褻狎戲謔凡涉時政得失官長賢否及親友家  
門私事與所作過失并詞訟請託等事一概不許  
道及違者註冊記過

一會中崇真尚樸備饌多不過八器圍坐葷不許  
過素若人少則四器亦可飯罷酒即止甚勿盃盤  
狼籍飲酒笑謔以傷風雅違者註冊記過

一會中置一冊子凡是日講論有能發明義理或近日有所心得即錄冊中以便商訂或有疑難一時不能明白者亦記冊中漸次考正亦日知其所亡月無亡其所能之意仍將所問答參悟有合於道者畧為綴記成篇以存其說

一彼此講論務要平心易氣即有不合亦當再加詳思虛已商量不可自以為是過於激辨舍己從人取人為善聖賢心傳正在於此否則雖所論極是亦見涵養功疎况未必盡是乎尤西川先生云讓古人是無志不讓眼前人是好勝

一學之不講孔子且憂况學者乎人心易放學問難窺故親師取友一則夾輔切磋使不至放逸其心一則問津指路使不至錯用其功總是自己求益非務外徇人也鄒東郭先生云講學者非以資口耳所以講脩德之方法也聞義而徙不善而改便是講學以脩德實下手處呂涇野先生云學不講不明非是自矜將驗己之是非又云學道之名亦不消畏避人知方是真做纔有避人知的心便與好名的心相近我輩浮沉世味悠悠歲月衰老將至漫無心得碌碌一生草木同朽豈不負父母

生成之恩為宇宙間一大罪人往者不可諫來者  
猶可追我輩大家猛省非求名譽非結聲氣總要  
各完自己性分各成自己人品不致喪盡幾希淪  
於異類富貴功名轉眼即空如不可求從我所好  
願同志者相與精進勇猛共證此事焉

一人非聖賢孰能無過吾輩發憤為學必要實心  
改過默默點檢自己心事默默克治自己病痛若  
瞞昧此心支吾外面即嚴師勝友朝夕從遊何益  
乎每見朋友中自己吝於改過偏要議論人過甚  
至數十年前偶誤常記在心以為話柄獨不思士

別三日當刮目相待舜蹠之分只在一念轉移若  
向來所為是君子一旦改行即為小人矣向來所  
為是小人一旦改圖即為君子矣豈可一瞥便棄  
阻人自新之路更有背後議人過失當面反不肯  
盡言此非獨朋友之過亦自己心地不忠厚不光  
明此過更為非細以後會中朋友偶有過失即於  
靜處盡言相告令其改圖即所聞未真亦不妨當  
面一問以釋胸中之疑不惟不可背後講說即在  
公會中亦不可對眾言之令彼難堪反決然自棄  
交砥互礪日邁月征庶幾共為君子改過遷善為

聖學第一義我輩勉之

一聖賢義理載於五經四書而其要在於吾身若舍目前各人進脩之實不以改過遷善為務縱將注疏大全辨析毫釐與已終無干涉聖學首重誠意自欺自慊皆在隱微獨知處勘證若徒彌縫形迹不實在心地打點即外面毫無破綻總是瞻前顧後義襲而取苦力一生究竟成一鄉愿到對天質人處心中多少愧怍我輩著實用力必期躬行心得義利誠偽關頭不可一毫將就混過此日勉強久之必有純熟境界陽明先生致良知為聖學真脈各求所以致之之道勿忽也

一近日風俗衰薄巧詐滋起凡我會中各宜敦本尚實力崇古道不得概從流俗苟且避諂至於四禮儀節亦當斟酌復古有斷當改正者亦不必因循隨眾

一善是大家公共的不是一人自私的為善却是自己擔當的不是他人強攀的既入會必須實實照約行否則彼此無益孟雲浦先生曰學者躡兩家船不得

新吾呂先生曰吾學工夫祇有事心一著最為喫

緊若把一心被耳目口鼻四肢驅策如犬馬役使如奴婢男兒七尺之軀不能爲他做一主張發之言動措之事業縱有一二可觀都是氣質作用安得盡合道理協於天則必須大勇猛振委靡之氣堅果確之心勿以戒慎恐懼爲桎梏勿以怠荒淫肆爲膾炙於發憤忘食之中嘗樂以忘憂之味久則和順於道德優游於矩度馴焉安焉纔是得力處嗚呼呼吸一過萬古無輪迴之時形神一離千載無再生之我悠悠一世可爲慟哭又曰聖學入門先要克己歸宿只是無我蓋自私自利之心是

立人達人之障此便是舜跖關頭死生歧路又曰敬者不苟之謂也敬無他攻擊此心之苟而已故苟則不敬敬則不苟戒慎恐懼心體不苟也中規中矩步履不苟也無淫視無側聽耳目不苟也安定辭守如瓶聲音不苟也無衆寡無小大無敢慢與人不苟也一息尚存此志不容少懈終身不苟也敬外無聖人居敬外無聖人之道其始也毋不敬終也恭而安盡之矣又曰防欲如挽逆水之舟纔歇手便下流力善如緣無枝之樹纔住脚便下墜是以君子之心無時而不敬畏也又曰學者要

養心氣。心氣一衰，萬事分毫做不得。又曰：胃中只擺脫一戀字，便十分爽淨，十分自在。人生最苦處，只是此心沾泥帶水。明是知得，不能割斷耳。又曰：才能技藝，讓他占個高名，莫與角勝。至於綱常大節，定要自家努力，不可退居人後。

夏峯孫先生曰：靜坐讀書，須先澹其安飽之念，方稱好學。自世人以富貴為性命，以貧賤為讎敵，而壞心術，喪名節，祇此欲惡兩念為之祟耳。程子曰：大凡學者，學處患難貧賤，今觀孔顏樂處，不出乎世情所謂澹泊憂愁中。即伊川氣貌容色，逾勝平

生亦自澹。川貶後見之，益信聖賢所為樂，不於富貴得志時。學者正要於此處見得分明。又曰：世人不知學者勿論，即素有志於學，動輒曰：目前為貧，所苦為病，所苦為門戶所苦，為憂愁拂逆所苦，不知學之實際。正在此貧病拂逆種種難堪處，不可輕易錯過。若待富貴安樂時，始向學，終身無學之日。學之晦於天下也久矣。又曰：大凡向學之人，獨立之意多，近於方方之弊也；為單板隨人之意多，近於圓圓之弊也；為軟熟初學宜以方入學力深，單板自化斷不可失之軟熟耳。新吾先生為同郡

先哲夏峰先生為今日先覺故各摘語錄數則與  
同志共勗焉

湯子遺書卷一終

湯子遺書卷一

會約

三九

